

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
OPĆINSKI SUD U ZAVIDOVIĆIMA
Broj: 042-0-Su-25-002039
Zavidovići, 1.12.2025. godine

Na osnovu člana 17. i 18. Pravilnika o unutrašnjem sudskom poslovanju („Službeni glasnik BiH”, br. 66/12, 40/14, 54/17, 60/17, 30/18 i 83/22), krivično odjeljenje Općinskog suda u Zavidovićima donosi:

INSTRUKCIJU o primjeni standarda *prima facie* očigledne nezakonitosti dokaza u krivičnom postupku

I. UVODNE ODREDBE

Ovom instrukcijom utvrđuju se kriteriji i postupak za identifikaciju i isključivanje dokaza koji su *prima facie* očigledno nezakoniti u krivičnim postupcima vođenim pred Općinskim sudom u Zavidovićima, u skladu sa Zakonom o krivičnom postupku Federacije Bosne i Hercegovine, Ustavom Bosne i Hercegovine i Evropskom konvencijom o ljudskim pravima.

Svrha Instrukcije je obezbjeđenje jedinstvene sudske prakse, procesne ekonomičnosti, poštovanja prava optuženog, te osiguranja zakonitosti i pravičnosti postupka.

Instrukcija je upućujućeg karaktera.

II. NORMATIVNI OKVIR

1. Zakon o krivičnom postupku Federacije BiH — čl. 10. i 11.
2. Ustav Bosne i Hercegovine — član II/3.g.
3. Evropska konvencija o ljudskim pravima — čl. 6. i 8.
4. Praksa Ustavnog suda BiH — AP-953/05, AP-3059/06, AP-4381/09.
5. Praksa ESLJP — Schenk v. Switzerland, Allan v. UK, Khan v. UK, P.G. and J.H. v. UK, Bykov v. Russia (GC).

III. STANDARD *PRIMA FACIE* NEZAKONITOSTI

Sud je ovlašten da već u najranijoj fazi postupka utvrdi da je određeni dokaz očigledno nezakonit, bez provođenja dodatnih dokaza ili opsežnog činjeničnog ispitivanja, ako iz samog načina pribavljanja dokaza ili formalnih okolnosti njegovog nastanka proizlazi „jasna, vidljiva i nesumnjiva povreda zakona ili osnovnih prava optuženog“.

Takvi dokazi se ne smiju koristiti ni direktno ni indirektno.

IV. KRITERIJI ZA UTVRĐIVANJE *PRIMA FACIE* NEZAKONITOSTI

Sud će smatrati da je dokaz *prima facie* nezakonit kada postoji jedna ili više sljedećih kategorija nezakonitosti:

1. Povreda osnovnih ustavnih prava

- dokaz pribavljen povredom prava na privatnost (npr. tajno snimanje bez naloga),
- dokaz pribavljen torturom, prinudom, prijetnjom ili nezakonitim ispitivanjem,
- uzimanje iskaza bez branioca u slučajevima obavezne odbrane i bez valjanog poučavanja o pravima,
- povreda prava optuženog iz čl. 6. EKLP.

2. Povreda izričitih odredbi ZKP-a Federacije BiH

- pretres obavljen bez naredbe i bez postojanja zakonom propisanih izuzetaka,
- privremeno oduzimanje predmeta izvršeno od nenadležnog organa,
- prepoznavanje izvršeno suprotno propisanoj proceduri,
- mjere prisluškivanja naređene od nenadležnog organa ili bez nadzora suda.

3. Lančana kontaminacija (plodovi otrovne voćke)

- dokaz neposredno proističe iz prethodno isključenog nezakonitog dokaza,
- dokaz zasnovan na obavještajnim aktivnostima bez sudske naredbe,
- dokaz koji se oslanja na podatke pribavljene povredom osnovnih prava.

4. Nedostatak elementarne pouzdanosti dokaza

- anonimni iskazi bez provjere,
- dokumenti bez potpisa, ovjere ili identifikacije autora,
- dokazni materijal nepoznatog porijekla bez mogućnosti provjere autentičnosti.

V. POSTUPAK UTVRĐIVANJA NEZAKONITOSTI

1. Sud odlučuje po službenoj dužnosti ili na prijedlog tužioca ili branioca.
2. Odluka se može donijeti u fazi prethodnog saslušanja, te fazi glavnog pretresa.
3. Sud će omogućiti strankama kratko izjašnjenje prije donošenja odluke u fazi glavnog pretresa.
4. Ako je dokaz nezakonit, sud donosi odluku o izdvajanju dokaza u fazi odlučivanja po optužnici.
5. Izdvojeni dokaz se ne može koristiti ni direktno ni indirektno u daljem postupku (čl. 11. ZKP FBiH).

VI. KRITERIJ TEŽINE POVREDE

Pri ocjeni sud cijeni:

- prirodu i jačinu povrede Zakona o krivičnom postupku F BiH,
- uticaj povrede na pravičnost postupka,
- značaj očuvanja zakonitosti u krivičnom pravosuđu.

VII. ZAVRŠNE ODREDBE

Ova Instrukcija stupa na snagu danom donošenja.

Primjenjuje se u svim krivičnim predmetima pred Općinskim sudom u Zavidovićima.

Dostaviti:

- Su
- svim sudijama K odjeljenja



Predsjednica krivičnog odjeljenja:


Klaudija Saletović